

Shenjtorët shqiptarë, Skenderbeu, Fan Noli dhe Kryepiskopi Anastas



Nga Nikolla Barkaj-

Komuniteti orthodhoks në Shqipëri ka një pasuri të madhe sa i takon objekteve të kultit, ku përfshihen këtu qindra Kisha dhe Manastire si dhe prona të tjera me vlerë të madhe shpirtërore për besimtarët.

Prej 27 vitesh, Kryepiskopi i Tiranës, Durrësit dhe i gjithë Shqipërisë, Anastasi, është përkujdesur që të ringrejë nga themelet Kishën Orthodhokse Autoqefale të Shqipërisë.

Duke mos folur për dëmet që komunizmi i egër i shkaktoi Kishës Orthodhokse, Kryebariu ynë, Imzot Anastasi nën përkujdesjen e tij atërore dhe mbi të gjitha financiare, ka mundur që të rindërtojë nga hiri të gjitha monumentet e kultit orthodhoks ku besimtarët mund të luten në Shtëpinë e Perendisë.

Jo vetëm kaq, por orthodhoksia në Shqipëri, ka edhe një pasuri të madhe sa i takon shenjtorëve dhe personaliteteve të mëdha që kanë dhënë kontributin e tyre me

hirin e Zotit për besimin tonë.

Mund të përmendim këtu figura historike si Gjergj Kastriot Skënderbeun, Shën Angjelina Arianitin, Shën Astin, Shën Lefterin, Onufër Neokastritin, Shën Nikodhimin e Beratit, Peshkopët Theofan Nolin, Irine Banushin dhe Kristofor Kisin, etj.

Nën kujdesin e veçantë të Kryepiskopit Anastas, për të gjithë këto figura të rëndësishme janë zhvilluar aktivitete, predikime, kumtesa, konferenca të ndryshme ku është përmendur kontributi i tyre i madh për besimin orthodhoks.

Po ashtu, Kryepiskopi Anastas ka shfrytëzuar të gjithë infrastrukturën e duhur për ti dhënë pozitën që meritojnë këtyre figurave, duke botuar shkrime dhe emisione në media me qëllim për të ringjallur këto ikona.

Qëllimi i Kryepiskopit Anastas ka qënë rikthimi në kujtesë i të gjithë këtyre ikonave duke i percjellë brezave të rinj pasurinë orthodhokse që Shqipëria ka trashëguar prej shekujsh.

Megjithatë ka zëra që kundërshtojnë këto ngjarje, ose përpiqen që të hedhin baltë mbi këto vepra.

‘Lidhja e Intelektualëve Orthodhoksë të Shqipërisë’ ka të drejtë t’i shprehë mendime dhe t’i propozojë nisma Sinodit të Shenjtë të Kishës Orthodhokse Autoqefale të Shqipërisë për çeshtje të ndryshme që lidhen me historinë e Kishës si dhe me rëndësinë për figurat e besimit orthodhoks.

Prej 27 vitesh, jo vetëm lavdia e Kishave është ringritur nga pluhuri i harresës, por falë kontributit të Kryepiskopit Anastas, të gjithë personalitetet që kanë lënë gjurmë në besimin dhe kishën tonë, kanë vendit që u takon duke i kujtuar dhe duke përcjellë për brezat e rinj punën dhe sakrificën e tyre ndër shekuj.

Çdo vit me rastin e përvjetorit të vdekjes së Heroit tonë Kombëtar, Kryepiskopi Anastas e kujton në Liturgji, veprën e Skenderbeut, si një mbrojtës i krishtërit.

Kisha ka një rol të rëndësishëm për ruajtjen e veprave të personaliteteve që kanë lënë histori me veprat e tyre për ruajtjen e besimit orthodhoks, duke dhënë dhe jetën e tyre.

Jo vetëm Skenderbeu, por të gjithë shenjtorët me origjinë shqiptare nderohen dhe respektohen nga Kisha Orthodhokse Autoqefale e Shqipërisë, jo sepse dhanë jetën e tyre për Krishtin, por edhe për faktin se origjina e tyre rridhte prej trojeve shqiptare. Kjo i bën më të lidhur me besimtarët shqiptarë.

Fan Noli, është një tjetër figurë e rëndësishme, që Kisha Orthodhokse shkel nën udhën që ai eci.

E gjithë kjo përpjekje e Kryepiskopit Anastas, është për të promovuar këto personalitete duke i prezantuar shqiptarëve dhe botës, veprat e tyre për ruajtjen e besimit.

Mbi të gjitha le të flasim veprat, ku kishat, manastiret, shkollat, spitalet, mencat dhe shtëpitë e të moshuarve të themeluara nga Imzot Anastasi, tregojnë se udha e krishterë është e shenjtë dhe qëllimi i saj është ti qëndrojë afër komunitetit dhe të promovojë vlerat e saj, ku patjetër nuk mund të lihen jashtë të gjithë ata që kanë dhënë gjakun e tyre për besimin.

kohajone.com